

EDICION SPECIAL HIMNO Y BANDERA



Exposicion di cuadranan di Sr. Joannes Donati

Dia 18 di maart na Archivo Nacional Aruba

ORANJESTAD(AAN):Joannes Donati, no ta un desconocido na Aruba, pa su bunita obranan di arte cu el a pinta pa hopi aña. Joannes Donati, conoci bou di su amigonan como “Bubu” of “Donati”, a nace na Aruba dia 14 di mei 1931 y ta pintando obranan bunita, inspirativo y unico desde cu el a cuminsa pinta na un edad hoben. Con Joannes a cuminsa pinta? Kico tabata su inspiracion? “Mi a cuminsa pinta na un edad hoben, bayendo scol. Mi tabata cana un mainta y mi a mira un coneu crusa coriendo mi dilanti. E movicion aki, a keda den mi pensamiento henter dia. Mi a bay cas y mi a purba pinta locual cu mi a mira, locual a impresiona mi. Mi a keda pinta y coregi, te ora cu e pintura tabata cuadra, cu locual mi a mira e mainta ey” Joannes Donati ta conta. Asina su amor y dedicacion pa arte a cuminsa. Na Hulanda, na 1986, un profesor di un atelier Sr. Rinus Manschot a bis’e “Joannes, abo no mester di un certificado di un scol di arte, abo tin talento natural”! Pintamento ta su hobby y su pasion. “Ora mi cuminsa pinta, mi por bay dor pa oranan largo, mi no kier stop”!

Bin abo tambe pa disfruta di e bunita obranan di Sr. Joannes Donati, cu tambe lo forma parti di e exposicion **“Aruba y su rumanan den Reino, dor di e lens Hulandes, 1950-1960”**. E exposicion presenta pa Archivo Nacional Aruba y UNOCA lo ta habri pa publico dia 18 di maart, na Archivo Nacional Aruba, cuminsando pa 9 or di mainta te cu 6 or di atardi. E Festividad Nacional ta un celebracion completo di nos dia di Himno y Bandera, cu un exposicion di potretnan di Aruba, Boneiro, Corsou, Saba, St.Eustatius, St.Maarten y Surinam durante e añanan ’50. Tambe tin un exposicion di e coleccion di stampia di Post Aruba NV y tambe di e bunita obranan di arte di Sr. Joannes Donati.

E cushinanan lo ta bon surti, e bar ta completo y lo tin entretenimento pa henter famia cu baile di cinta bou direccion di señora Lia Lopez, gruponan di bailenan Sunrise Dancers, Chazz Dancers, Gucchi Baby y D-Royalty y musica lo ta na encargo di DJ New Born, Grupo Melodia y Banda DURO.

Tambe lo tin diferente premio pa e bishitantenan di exposicion manera un ticket cu Insel Air di Aruba-Surinam-Aruba y di Setar Aruba un telefon, tablet y carchi di telefon, dinner for two y yen di otro premio mas. Entrada pa e exposicion ta un florin pa persona!

Bin pasa un dia di famia na Archivo Nacional Aruba di 9 or di mainta pa 6 or di atardi dia 18 di maart!